

Leschauer

La Maladie de la France

1618

1602

Paris 1618



77

1618

LA
MALADIE
DE LA
FRANCE.

Discours en deux Parties.

Presenté l'an 1602. au Roy

HENRY LE GRAND,

PAR

M^e IAQVES LESCHASSIER

Aduocat en Parlement.



A PARIS,

De l'Imprimerie de PIERRE DVRAND,
au mont S. Hilaire, à l'image S. Sebastien,
deuant le Puits-Certain.

M. DC. XVIII.

AVEC PRIVILEGE DV ROY.

Case

F

39

326

1615 R

THE NEWBERRY
LIBRARY



L A

MALADIE DE LA FRANCE.

PREMIERE PARTIE.

LE Royaume de France est subiect à la mesme maladie, dont il a esté autresfois comme abatu, & dont il n'est reuenu qu'après de longs siecles, & après vne mutation de la race Royale. C'est l'infeodation des gouuernemens, par laquelle la maison Royale se diminuë ou s'esteinct, & d'autres grandes se leuent de sa diminution ou extinction. Ià sous la seconde race des Rois de France ce Royaume est tombé en tel mal. Car hors peu de villes de Picardie, qui furent delaisées au Roy Charles le Simple pour sa part, tout le reste fust tenu en fief de sa Couronne en tous droicts Royaux, en mesme façon que Charles le Quint tenoit de la France, la Flandre &

l'Arthois, & en la façon aussi que le Duc de Lorraine tient aujourdhuy le Duché de Barrois, qui seul est demeuré de ceste mutation iusqu'à ce iour, tenant de la Couronne en ceste nature. Il faut cognoistre la naissance & le progrez du mal, & puis trouuer le remede. Le mal vient par quelques degrez: Le premier est le pretexte qu'aucuns des plus grands prennent de se mescōtenter s'ils n'ont des Gouuernemens de Prouinces, par lequel mescontentement ils forcent en quelque façon les Rois de leur en donner: puis ils y veulent des establissemens, comme ils appellent, qui est le second degré de ce mal, quand ils tiennent leurs gouuernemens en leur main, pouruoyans aux Capitaineries des meilleures places. Le troiesme degré est l'inféodation, laquelle ils ne peuuent obtenir que d'un Roy foible, ou à qui le tiltre de la Couronne est querellé. Alors ils se liguent tous de suiure celuy des contendans qui fait leur condition meilleure, lequel ils font vn Roy imaginaire & dépendant entierement de leur volonté. Le danger de l'inféodation est proche, quand non seulement ils ont leurs gouuernemens à vie, mais encores qu'ils en obtiennent des suruiuances, ou qu'à autre tiltre quelques gouuernemens passent de pere en fils avec quelque establisement: ce qui donne exemple & desir du semblable à tous les autres.

Ce mal est venu autres-fois de la foiblesse des Rois, & maintenant il vient d'une autre cause souz vn Roy nompareil en valeur, & redouté de ses voisins. Mais il est grandement à craindre, que ce mal soit pour esclorre à la premiere regence & minorité, ou autre foiblesse de Roy ou de Royaume où la France pourra tomber. La cause de ce mal est la Venalité des charges publiques, qui a gagné iusqu'aux gouuernemens. Il y a deux sortes de subiects en tout Estat; assauoir le corps public qui est composé des Magistrats, Iuges & tous Officiers qui leur seruent: & le corps priué qui est de tous autres subiects qui n'ont aucune fonction publique. Du bon reiglement qui doit estre au corps public depend plus que de toute autre chose la seureté de l'Estat souuerain. La plus mauuaise qualité qui puisse estre au corps public, est la Venalité, laquelle est en celuy de France. Car de toutes les charges publiques, les vnes se vendent par le Roy & sont en ses parties casuelles, les autres qui n'y sont pas ne laissent pas d'estre vendues des vns aux autres avec le cōsentement ou la cōnuence du Roy. Le mal autorisé aux charges qui sont aux parties casuelles, passe par vne necessaire consequence en celles qui n'y sont pas. Car le credit & l'autorité qui est donné à l'or, d'achepter l'honneur & de luy estre superieur, s'accroist

fort aisement. Si vn office de Sergent se vend aux parties casuelles, il est impossible d'empescher qu'une charge d'archer du Corps ne se vende de l'un à l'autre. Si vn office de Iuge inferieur se vend aux parties casuelles, on donnera recōpence de l'un à l'autre d'une charge de Gouverneur, & de toute autre charge militaire. Or ceste nature Venale des charges publiques, est ja vne espece de propriété qui fait desirer au Gouverneur que sa charge qu'il a payée, demeure à son fils, & qu'elle ne soit pas perduë par sa mort, comme son argent ne le seroit pas, & estimer qu'il luy est fait tort s'il aduient autrement. Encores que le Roy entende que les gouverneurs se baillent de l'un à l'autre seulement le prix de la garde de leurs gouuernemens, si est-ce qu'il faut s'asseurer que l'acheteur entend acheter nō la garde, mais la viue esperance de la propriété. Car quant à l'estimation & au prix de la garde, il est deu par le Roy au gouverneur pour son seruice, non par le gouverneur au Roy ou a autre par la volōté du Roy. Dōcques ils s'imaginent vne propriété à retenir pour eux en leurs gouuernemens par vn droit des gens qui veut que ce que chacun a acheté & payé, luy demeure. Si tous les Gouverneurs le pensent & souhaitent ainsi, c'est vne secrette alliance qu'ils ont ensemble, sans parler l'un à l'autre, de l'impetrer ainsi de

leur maistre, ou d'en chercher & en faire vn qui le leur accorde. Ils font les mains & les bras du Roy, par lesquels il tient & garde ses Prouinces & ses places : sans eux il reste cōme seul, ayant peu de force & de mouuement.

Le secours des bons est trop foible contre ce mal, puis que la Venalité des honneurs corrompt en fin la vertu, rend la foy venale, & pour vn prix qui croist tousiours. Car si quelqu'un pour sa vertu a obtenu vn gouuernement, il n'estime pas auoir obtenu vn vray hōneur, qui est inestimable & n'a aucun prix, mais vne chose que les autres recourent pour de l'argent. Et outre il s'estimerait sot, si pour estre vertueux il estoit en la nature de son gouuernement de pire condition que les autres, & s'il n'auoit les desirs & desseins qu'il voit communs aux autres. De sorte qu'il faudroit qu'il eust vne vertu extraordinaire & quasi plus qu'humaine, si en ceste apparence de croistre en hōneur, il ne souhaittoit & aspiroit à ce que ses enfans fussent vn iour Princes de son gouuernement. La nation Françoisise est fort disposée à la vertu. Car en vne si grande deprauation, il y a encores bon nombre de gens de bien qui seruent le public. Toutesfois il paroist manifestement que leur nombre & leur affection decroist autant que croist le prix de la vente des charges publiques.

Il est donc bien aysé de iuger, que ce Souuerain là met son Estat & sa vie en la puissance de l'or, qui vend ou souffre que l'on vende la garde de la iustice, de sa bourse, de ses places, de ses frontieres, de ses prouinces, de son logis, de son secret, de son epee, de son corps: lesquelles choses estans de leur nature sacrees en vn Estat, la Venalité les profane, & les ayant auilies les donne en proye à l'or, à qui on les a ja assuietties. La puissance de l'or naturelle & legitime est aisez grande par tout le mōde, d'achepter les choses qui sont de leur nature Venales & de leur commāder. Que si on luy donne superiorité sur aucune des autres, il ne peut souffrir de borne & de mesure, & disposera du pouuoir de celuy qui luy veut limiter le sien. Le plus grand droict des Souuerains, est de distribuer les hōneurs, les pouuoirs & charges publiques à qui bon leur semble, & c'est par là que principalement ils regnent. Si en ce droit ils associent l'or avec eux, ils s'accompagnent d'un plus puissant & plus grand seigneur qu'eux; qui de compagnon se fera maistre, & leur otera la part qu'ils se pensent reseruer. Ce qui les trompe ordinairement est, que si celuy d'entr'eux qui reçoit le prix de la vente des charges publiques, sentoit quant & quant la diminution ou la perte de son autorité que vraiment il vend moyennant ce prix,

ores

presentee au Roy. 1602. 9

ores qu'il ne le pense pas, il se garderoit bien de le faire. Mais d'autant que le predecesseur qui reçoit le prix, ne fait point de sensible perte, ains sur le successeur qui n'a pas receu le prix, se faict la deliurance de la chose vraiment vendue, qui est vne partie de l'autorité souveraine qui passe du successeur en autre main, & ainsi par degrez se va du tour perdant: cela est cause que chacun de ceux qui vend, ne pense pas rien perdre. Ainsi en France nostre Roy souffre la perte de son autorité, dont ses predecesseurs ont receu le prix. Ainsi le mal croissant dans les necessitez presentes par vne plus grande charté qui se voit en ces marchez, il seroit à craindre que Monsieur le Dauphin trouueroit encor plus d'autorité ja alienee souz nostre Roy, lequel Dieu nous a bien donné tel qu'il y a grande apparance que ce qu'il ne pourra faire pour le restablissement de son Estat, vn autre apres luy ne le fera pas. Doncques le mal presse la France, & requiert vn prompt remede.

PREMIER CHEF DV

REMEDE.

LE remede à ce mal a deux parties. L'vne est de tirer les gouuernemens hors du

commerce, & les rendre temporels. L'autre de faire retourner toutes charges en tel estat, qu'elles soient donnees à temps à personnes choisies, & en attendant qu'un mal si inueteré se defracine, empescher cependant par vne forte barriere, que la consequence des charges publiques qui sont aux parties casuelles, ne passe aux gouuernemens & capitaineries de places. Pour paruenir au premier, il est besoin que trois Estats, dont les interets sont tres-conioints, se rallient ensemble, à sçauoir le Roy, la Noblesse, & les Villes: car à ces trois Estats, vne mesme chose est tres-bonne, qui est la conseruation de l'Estat Royal en la personne du Roy & de sa posterité, & vne mesme chose leur est contraire, à sçauoir le desir que quelques gouuerneurs pourroient auoir de s'approprier de leurs gouuernemens. Le moyen de les rallier sera quand le Roy, apres auoir donné à son peuple la descharge que ses affaires peuuent porter, aura à sa suite des deputez de la Noblesse, & des villes de chacune prouince ou gouuernement pour conferer avec eux en liberté de leur bien commun. Ce qui ne derogé nullement à la grandeur du Roy, pour ce qu'ils ne feront ses Conseillers necessaires. Ains ce sera vn moyen assure de l'execution de ce qu'il a à faire pour rendre tous les gouuernemens autant esloignez de l'heredité,

comme on les en a iusqu'icy approchez. Puis à la requeste de ces deux Estats, la Noblesse & les Villes, le Roy retiendra aux capitaineries des places ceux qui ja y sont, mais en telle façon que chacun d'eux apres auoir gardé vne place pendant vn temps que le Roy determinera, le temps suiuant en ira garder vne autre, & de temps en temps les remuera tousiours, s'il ne les gratifie de quelque autre charge ou en sa maison ou entre ses gens de guerre. Par ce moyen ils serōt tousiours capitaines, mais non pas de mesmes places. Que s'il semble que les affaires du Roy ne souffrent pas que l'on contraigne les capitaines des places à cet ordre, pour ce qu'il ne les faille pas mescōtenter, il se trouuera vn expedient qui non seulement leur fera consentir & vouloir cela, mais encor' le leur fera desirer & requerir, lequel moyen de pendant d'un plus long discours, ne peut estre contenu dans la briefueté de ce memoire. Pour les gouuernemens des prouinces & lieutenances aux gouuernemens il fera le semblable peu à peu, autāt que le moyen luy en viendra par la vacation ou par la recompence d'autres charges qu'il leur pourra donner. Ceux qui auront esté en charge de gouuerneurs ou de capitaines des places, ores qu'ils ne soyent pour quelque temps en exercice, en auront neantmoins les honneurs & le rang entre leurs

compagnons & par tout, à ce que leur pouuoir soit estimé perpetuel, ores que l'exercice ne le soit pas, estans du corps & du nombre de ceux dont le Roy enuoyera des gouuerneurs & capitaines aux prouinces & aux places. Pour ne pouuoir vser de ce moyen en tous, le Roy ne doit laisser de le practiquer où il pourra de ses places ou gouuernemens. Car les gouuerneurs qui resteront, en seront plus foibles en leur intelligence, s'ils en vouloyent cōtraier. Il s'en fera vne loy verifiée par tout, lors que le progrez de ce changement sera si aduancé que l'ordōnance s'en pourra faire seurement. Cet ordre sera vtile à l'Estat Royal, & plausible à tous ses subiects.

SECONDE CHEF DV

REMEDE.

POUR le second chef du remede, il faut faire difference du vray honneur & du faulx, faire sourdre & croistre en France le vray honneur politic qui oblige les hommes au Roy, defraciner & arracher le faulx qui n'engendre aucune obligation enuers le Roy. Il les faut deuant opposer l'un à l'autre, & faire comparaison des deux. Le vray honneur politic est la bonne opinion & le iugement que l'on faict de la vertu & du merite d'un hom-

me, le choisissant entre plusieurs pour luy fier vn pouuoir & charge publique. Ce choix & ceste fiance est inestimable, & est le vray prix de la vertu. Le faux honneur est celuy qui est donné, non au choix de la personne, mais au choix du plus grand poids de l'or, lequel estant honorable par tout ailleurs, est ignominieux en cet endroit. Le vray honneur donne courage & couronne le front d'assurance, quand les yeux des hommes tournent vers celuy dont le public a faict vn iugement honorable. Le faux honneur oste le courage, rend l'acheteur honteux & confus, qui demande souuent en soy-mesme pourquoy on l'a mis où il est. De là vient que le vray honneur oblige à vne parfaite fidelité, & donne vne crainte du reproche de trahison, qui est aussi plus ignominieuse, plus criminelle & horrible en celuy qui est choisi gratuitement & par vn pur honneur qu'en tout autre. Au contraire le faux honneur fait penser à l'acheteur, qu'il ne doit fidelité que pareille à l'obligation qu'il a à celuy qui l'a pourueu. Aussi n'est-il fidelle qu'autant qu'il luy est nécessaire d'asseurer son bien qu'il a en son office. S'il se presente vne entreprise qui le luy assure, la nécessité de sa conseruation luy est vne excuse d'infidelité. Voire en suiuant sa seureté il n'est gueres infidele. Car la fiance oblige la foy & la prouoque.

Qui vend vn office ne suit pas la foy de l'acheteur, mais la suffisance de son argent. Or où il y a moins de fiance d'une part, il y a moins de foy de l'autre, & partant moins d'infidelité. Et puis que l'office est donné à l'argent, l'officier est obligé à son bien, lequel il doit asseurer. Que si la conseruation de l'office le persuade de suivre vne rebellion ou faction qui par apres soit vaincue, il merite vn reestablisement. L'argent que le Roy prend pour les offices n'est pas commodité, mais vn grand appauurissement. Car aux Estats ou Republiques où on n'achete point l'honneur, le souverain seul le crée de choses qui ne luy coustent rien. Il en fait autant qu'il en a besoing, & nul que luy n'en peut faire. Ses coffres en sont toujours pleins, ils ne s'en peuuent espuiser. Ainsi les sages peuples ont fait servir des fucilles d'arbres ou autres telles choses faciles à recouurer de marques d'honneur, qu'ils ont bien sçeu faire rechercher par les hommes de merite avec de grands trauaux & perils, récompensans des vertus magnanimes par ces honneurs qui ne chargeoient point leurs finances. Les Rois n'ont pas moins de moyen d'en creer, s'ils sont aduisez de l'adresse, qu'il faut tenir pour les choisir conformes à l'espece de leurs Estats, aux mœurs, aux opinions, à la maniere de viure de leurs peuples, & s'ils sçauent leur

donner valeur, & les faire desirer par les hommes de merite sur toutes choses. Alors la vertu & la foy enuers le souuerain estans prisees & honorees par dessus l'or & non au dessous, il se trouue nombre d'hōmes au seruice de l'Estat bruslans d'un desir du vray honneur, qui sous vn pauvre toict & en vne vie frugale font gloire de m'espriser l'or des Rois voisins. Mais aux Estats ou on achete les honneurs, la recompense souhaitee des hommes de merite n'est que l'or, dont la cupidité monte bien tost à vne quantité que le souuerain ne peut fournir, & se peut trouuer quelque-fois de ses voisins qui en peuuent donner autant ou plus que luy, ce qui le rend pauvre, la cupidité de ceux qu'il a à recompenser surpassant les moyens de luy & de ses voisins, comme l'on voit en France, où ceste venalité & ce prix de l'or a tant ouuert l'appetit de plusieurs François, que la France & l'Espagne sont desormais trop pauvres pour les contenter. Le souuerain qui vend les charges publiques, diminuë encor son pouuoir. Car qui donne vn honneur, le peut donner à tel temps & telle cōdition qu'il luy plaist. Qui le vend n'a pas ceste liberté, s'il ne veut faire iniustice. D'auantage celuy qui donne, s'il veut donner à certain temps, il a tousiours vn obiect à proposer à l'esperance sans lesquelles les hommes ne peuuent viure.

Car chacun de ses seruiteurs se propose qu'en bien seruant en choses moindres, il montera par degrez à charges plus grandes. Au contraire, l'homme de bien & de foy n'a rien à esperer en France. S'il a plus d'argent que les autres, il n'a que faire de plus grande fidelité que les autres, il aura pour son argent les plus grands honneurs de sa profession. Doncques le vray honneur engendre vne vraye vertu & vne vraye foy capable d'estayer & soustenir vn berceau regnant. Le faux honneur engendre vne faulse vertu & vne faulse foy capable d'escrouler & renuerfer vn siege Royal ancien & puissant, ores que l'on y voye assis vn Roy le plus valeureux du monde.

Pour estouffer l'un en France, & faire sourdre l'autre, il faut supprimer la venalité avec iustice, & introduire le choix des hommes. La suppression de la venalité par mort est iuste, mais s'il n'y a autre remède, elle encherit les offices au profit iniuste des vendeurs, qui sont les officiers vendans à beaucoup plus grand prix qu'ils n'ont achepté. Partant le bien qui vient au public par la suppression que faict le Roy, est euacué par la grand' charté qu'y mettent les vendeurs. Pour les retenir dans les termes de la iustice, il est besoin que quiconque voudra resigner son office prenne le iuste & ancien prix du Roy qui baillera l'office à vne
personne

personne choisie d'entre plusieurs pour le mesme prix. Il est aisé d'abuser au nom du Roy de cet expedient, prenant la plus-valeur pour luy : ce qui ne sera qu'asseurer la venalité en France, qui monte en fin iusques là que celuy qui souffre tout estre vendu, est aussi vendu. Mais si l'on en veut bien vser, c'est vn moyen pour sapper peu à peu la venalité des charges publiques, qui est vn mal mortel à tous Estats, & d'autant que comme vne gangrene, il gaigne & ira tousiours iusqu'aux plus grandes charges, ainsi que l'experience l'a trop monstre, & donnera vn prix à l'or qui vendra l'Estat mesmes en detail, ne se pouuant achepter en gros.

Arrachant la venalité il faut planter le choix des hommes. Il y a en France vn denombrement de toutes les charges que le Roy vend, & vne description des autres. Mais il faut faire aussi vn denombrement d'hommes choisis de toutes les prouinces en toutes professions & fonctions grandes & petites, qui soit la pepiniere dont le Roy enuoyera de lieu en autre des hommes pour faire les charges publiques à certain temps, tousiours hors de leur propre patrie, lesquels s'estans bien portez aux petites, monteront par degrez aux plus grandes de leur profession. Ceste pepiniere se renouuellera perpetuellement par subrogation d'hommes qui commenceront

aux petites & premieres pour monter par degrez en bien seruant. Cet ordre les rendra suffisans en leurs charges, ils auront tousiours à esperer. Leur esperance affermira leur foy. Leur plus grand merire sera en leur foy. La crainte de perdre leur bien en leurs offices ne les rendra point timides ou conuiens aux entreprises qui se feront contre le Roy. N'estans iamais employez, comme ils ne doiuent, aux lieux de leur naissance, la crainte d'en estre chassez ou le desir d'y estre maintenus par des entrepreneurs, n'aura point de pouuoir sur eux. Ils auront l'Estat cher, cōme leur champ d'honneur, où ils se feront estimer : & ceste longue liste d'inconueniens & de maux prouenans de la venalité & du souuerain pouuoir de l'or, cessera en la France, qui seule nourrit plus de manquemens de fidelité qu'il n'y en a au reste de l'Europe, pour-ce que seule elle a donné ce pouuoir à l'or d'estre maistre & superieur de l'honneur, puis qu'il l'acquiert & l'achepte. Aussi est-ce en recompense vne grande recommandation des François, que la France n'ayant plus de vray honneur à donner, trouue encor' de la vraye vertu qui la serue. Toutesfois le mal estant venu à ce degré auquel il est, il n'y a plus de raison de s'y fier d'auantage.

**ASSAVOIR SI LE PREMIER
CHEF DE CE REMEDE**

suffit sans le second.

MAIS d'autant que l'on pourroit penser que pour conseruer la France, le premier remede suffise sans le second, c'est à dire, qu'il suffise de retirer les gouuernemens hors du commerce & les rendre temporels, & que le Roy puisse laisser les offices qui n'ont point d'eguillon en la venalité en laquelle ils sont, pour le profit qu'il en tire : parauenture ce moyen là requiert trop de sollicitude, est d'une trop grande & fascheuse garde, & a trop peu de seureté pour conseruer l'Estat en la posterité du Prince qui en vse. Car la puissance de l'or est telle, que malgré les hommes il portera la consequence & contagion de venalité, resignation, suruiuance, heredité des petites charges aux grandes, des charges non militaires aux pouuoirs militaires gardiens des places & des prouinces, & de proche en proche en fera vn droict general. Vne pareille consequence fait la mutation qui aduint souz la seconde race de nos Rois. Alors la milice & les forces du Royaume consistoyent en la iouissance des fiefs que l'on bailloit aux gendarmes au lieu de

solde, & estoit ceste iouissance muable au commencement à la volonté du bailleur, puis à la vie du gendarme. La foy & hommage des vassaux d'auourd'huy estoit alors le serment militaire des gendarmes. Les Iuges & gouuerneurs de chacune ville, que l'on appelloit Comtes, auoyent en leurs compagnies & menoyent à la guerre les vassaux de leurs gouuernemens. Les Roys rendirent ces fiefs ou places de gendarmes hereditaires de pere en fils, non pas gratuitement, mais pour vn droit qui se payoit à chaque mutation, comme il en reste encor' des marques auourd'huy : & ceste succession de pere en fils sembloit alors vn droit plausible & fauorable. Les places de gendarmes estans renduës hereditaires, les Comtes qui estoient les capitaines, pretendirent qu'on leur faisoit grand tort, si ce droit ne leur estoit communiqué, & se l'attribuans vsurperent quant & quant les droits Royaux & souuerains en leurs gouuernemens pour vn seul hommage qu'ils en rendirent au Roy. Ceste consequence d'alors doit seruir d'exemple pour en eüiter vne semblable qui se presente en nos iours. Et d'auantage pour se contenter du premier remede, il faudroit que le Prince fust assure de n'auoir iamais autre guerre que celle qu'il voudra faire, & lors qu'il la voudra faire. Car l'occasion aux gouuerneurs de

passer à ceste consequence de proprieté apres tant de secouffes pareilles à celles que ce Royaume a souffertes , est vne guerre ciuile ou estrangere qui se face en partie à leur volonté. Alors se trouuans armez & necessaires ils donnent la loy à qui la leur doit donner , transforment leur serment de gouuerneurs en serment de vassaux, & forcent le Prince affoibli de leur delaisser à tout le moins pour de l'argent ses droits Royaux , qu'ils ont premierement occupez , comme l'Empereur d'Allemagne a vendu les siens en diuers endroiçts. Huiçt ans de guerre feirent le mesme changement qui aduint souz la seconde race de nos Roys , qui cousta au Royaume premierement vne mutation de la race Royale , laquelle les gouuerneurs sont necessitez de procurer , à ce que la nouvelle race ne se puisse plaindre que l'on ait rien vsurpé sur elle , & qu'elle ait raison de se contenter d'une Couronne telle qu'on la luy veut donner. Puis ceste mutation cousta au Royaume cinq cens ans de patience , auant qu'il ait peu reduire à son corps les pieces qui en estoient demembrees, dont le Barrois reste encor à reduire, outre la Flandres & l'Arthois, dont l'hommage est perdu. Si la guerre est vne occasion & vne ouuerture à ceste consequence d'heredité aux gouuernements, cet Estat là doit estre bien foible , qui faisant la guerre n'a

point de seureté dedans foy : car il n'y a rien qui donne tant de hardiesse à vn ennemi d'entreprendre, que s'il voit qu'il est dangereux à son voisin de se defendre. Et quand bien la France sera defenduë par le Roy dans tous ces inconueniens, comme elle le fera, luy estant assisté de Dieu, ainsi qu'il a tousiours esté : si est-ce qu'il ne le faudra attribuer qu'à ceste heroïque vertu que Dieu luy a donnée. Mais pour la seureté & la duree d'un Estat, vn ordre est requis qui le rende capable d'estre defendu par vne prudence & valeur commune. Meilleure encor est cet ordre, s'il peut soustenir vne minorité ou vn berceau regnant, quand il aduient. Outre cela ceremedes seul de rendre les gouuernemens temporels sans le second remede, mal-aisément pourroit-il durer. Car aux conseils des Rois leurs seruiteurs & fauorits ont grand pouuoir. Ce sont eux qui recueillent les bien-faits de leurs maistres, & qui sont gratifiez des gouuernemens, des places & prouinces. Ils n'ont pas tous, ny tousiours vne si parfaite vertu, qu'ils ne souhaitent ces gouuernemens là en la meilleure nature & condition pour eux qu'ils la peuuent impetrer, & ceste meilleure condition pour eux est la pire pour leur maistre, ou pour son successeur. Or tels qu'ils desirent les gouuernemens pour eux, tels faut-il qu'ils conseillent leurs maistres

de les dōner aux autres. Cet ordre donc estant si fresse , il ne se faut pas fier à luy seul. Brief, nous pouuons apprendre des registres des Roys & des Royaumes, qui sont les escrits des bons historiens , qu'il est necessaire d'une necessité autant absoluë qu'elle se peut trouuer aux affaires humaines , qu'en tel cas l'une de deux choses aduienne, ou que la souueraineté face mourir la venalité des charges publiques, ou que leur venalité meine à la mort la souueraineté : & particulièrement en France nous cognoissons à veuë d'œil , qu'autant que l'or regne, autant le Roy regne moins; autant que croist le pouuoir de l'or, autant celuy du Roy diminuë; & de ces deux Roys ou souuerains en vne mesme souueraineté, l'un sans cesse mine & mange l'autorité de l'autre. Partant il est meilleur & plus seur de pratiquer les deux remedes ensemble que i'ay deduits , que le premier seulement : & plus encor' à vn Roy lequel ayant posterité née, doit esperer d'estre la tige d'une longue ligne de Roys , qu'à vn qui n'en ayant point se contente quelque-fois de iouyr d'un profit present , laissant le soin de l'aduenir à ceux qui s'y trouueront.

LE MOYEN DE RENDRE
 EN FRANCE LES GOVVER-

*nemens temporels du consentement
 des Gouverneurs.*

SECONDE PARTIE.



AY dict au discours de la Maladie de la France, qu'il y a vn moyen de rendre en France les capitaineries & gouvvernemens des places ou prouinces temporels, & les faire seruir par tout du consentement & à la requisition de ceux qui les tiennent. I'ay dit aussi que ce moyen depend d'un discours plus long, ce que l'on ne doibt trouuer estrange, d'autant que si vn tel moyen eust peu facilement tomber en l'esprit des hommes, le feu Roy qui l'a tant desiré, en eust esté serui. Je le veux maintenant deduire le plus briefuement que ie pourray.

Ceux qui seruent les Princes souuerains se proposent deux fins, l'une de croistre en honneur & l'autre de croistre en biens. Ces deux fins sont ordinairement conioinctes, pour-ce qu'on ne voit guere d'honneurs & de pouuoirs publics qui ne soient accompagnés de quelque

quelque commodité : mais plus vne de ces deux recompenses a de pouuoir sur les hommes, moins l'autre est recherchee. Quand les mœurs sont bonnes, le principal but de ceux qui seruent est l'honneur, & lors l'Estat florit & se fortifie : quand les mœurs sont mauuaises, l'or ou le profit commande aux hommes plus que l'honneur, & lors l'Estat s'abaisse & s'affoiblit. L'une & l'autre recompense est en la main des Souuerains; mais ces Souuerains là qui gouuernent leurs Estats avec plus de simplicité, ne cognoissent guere que la recompense de l'or, non plus que les peres de famille qui se font seruir en payant de leur reuenue leurs seruiteurs. La Republique a encor ce que la famille n'a pas, le pouuoir de donner l'honneur pour solde & recompense laquelle n'est pas tant exposée à la cognoissance des hommes. Car la terre ne la produict pas comme elle produict ses fruiçts dont les tribus se payent : aussi n'est-elle pas enfermee dans le ventre des montagnes comme les mines d'or ou d'argent : ains elle est enclose & recelee dans le ventre de la puissance Souueraine, dont les hommes politiques la font esclorre en s'aidant de l'imitation des Estats qui s'en sont seruis.

Pour en faire quelque monstre, il fault distinguer les diuerses sortes d'honneur qui sont

principalement trois. En sa plus ordinaire & commune signification il signifie les pouuoirs & charges publiques que le Souuerain donne à qui il luy plaist. Secondement il signifie entre les cōditions ou diuers ordres des subiects ceux qui sont les premiers & plus honorables, comme la Noblesse a vn honneur par-dessus l'Estat commun & populaire. Aux païs aussi gouvèrnés avec plus de soing il y a plusieurs degres de peuple, plusieurs degres aussi de Noblesse. En France il y a eu autrefois quelques differences, il y en a encores aujourd'huy. Autrefois, outre les Cheualiers des ordres institués par les Roys de Frāce & les Cheualiers de l'accollade dont l'honneur se donnoit avec tant de ceremonies, & qui est encor tant estimé par quelques estrangers, il y auoit apres les premiers Barons du Royaume, des cheualiers portans banniere composee de leurs vassaux à la solde du Roy, d'autres cheualiers marchans sous la banniere d'autrui, & le dernier tiltre de Noblesse estoit des simples Escuyers. Auourd'huy il y a vne autre difference & d'autres degres entre les Gentils-hommes par les dignités & tiltres feodaux, comme de Ducs, Marquis, Comtes, Barons & autres. Ces exemples d'honneurs en petit nombre manifestent assés qu'il y en a d'autres en grand nombre qui peuuent estre excogités par l'esprit des hom-

mes, & creés par la puissance souueraine. La troisieme sorte d'honneur comprend les ornemens & marques exterieures attribuées à certaines personnes ou à leur race, pour reconnaissance de seruices recommandables. Tels sont les chapeaux ou courones, les bandeaux, les colliers, les bracelets, les habits certains qui les distinguent d'avec les autres, & autres ornemens de leur corps; les armoiries, les timbres, les trophées, les ornemens trionphans, les statuës, les surnoms honorables, les tombeaux ordonnés par autorité publique, & tant d'autres marques dont en diuers lieux la sagesse politique s'est aidée pour honorer les vns, & allumer en tous les autres vn desir de les imiter. Les anciens se sont plus seruis de ceste sorte d'honneur, & en ont accru & esleué leurs Estats. Quelques marques en restent en ce siecle sterile de telles recompenses. Les couronnes & chapeaux dont il y a eu de tant de sortes pour la recompense de diuers hommes & seruices, sont reduites aux couronnes & chapeaux que l'on voit aux armes ou escus des Ducs, Marquis ou Comtes. Les colliers qui seruoient autrefois à tant d'vsages, sont reduits aux ordres & fraternités des chevaliers, que les Souuerains ont dressés. Les bracelets ne sont plus que faueurs de dames. La iartiere sert encore à l'ordre d'Angleterre. Les statues

ne sont plus que des ornemens volontaires de grandes maisons pour conseruer sur leurs portaus la memoire de leurs hommes illustres. Les surnoms sont donnés à quelque races par fortune, ou coustume en faueur de quelques actes valeureux, comme en la maison d'Anglure où ils sont surnommés Saladins. Il n'y a point en la mine de l'or de vene plus seconde & abondante que celle là. Car qui voudra recueillir tels honneurs dont on s'est serui en diuers lieux & en diuers temps, & les rapporter & accommoder à l'vsage & aux opinions de cetemps, trouuera ceste source inespuisable & suffisante pour seruir à plusieurs grands effects.

Ces trois especes d'honneurs, qui sont la premiere des pouuoirs publics, la seconde des degrés de noblesse ou autre condition, la troisieme des ornemens exterieurs, sont toutes en la puissance du Souuerain, qui les crée & puis les distribuë: & par dessus cela il peut encor reformer le mal qui seroit en l'une des trois par le secours des deux autres. Pour exemple, si la distribution des pouuoirs publics qui font la premiere espece de ces honneurs est deuenue vicieuse & preiudiciable à son Estat, comme est en France l'vsage des gouuernemens perpetuels, le souuerain peut l'amander & corriger, faisant seruir les deux au-

tres especes d'honneurs à rendre les gouuernemens temporels du consentement de ceux qui les tiennent. Pour cela il est besoing commencer par les gouuernemens des places ou petites prouinces pour monter iusques aux plus grands par degres. Le Roy peut par la faueur choisir quatre Capitaines de places ou Gouuerneurs de petites prouinces qui seront contens de le seruir en leurs gouuernemens par tour, de telle façon que d'an en an il les changera & remuera de lieu en autre en leur quatre gouuernemens. Le choix de ces quatre fera le fondement de ceste mutation. Car ou le Roy peut donner tant d'honneur des deux autres especes que i'ay dites, à ces quatre gouuerneurs temporels, que les gouuerneurs à vie desirans y auoir part, veuillent apporter leurs gouuernemens à ses pieds pour estre seruis par eux avec les autres successiuellement & par tour: ou le Roy n'a point ce pouuoir. Si le Roy le peut, cét aduis est bon: & ce ne sera plus la faute de la chose, ains des hommes s'ils ne sçauent pas bien reconnoistre dans la puissance Royale, l'honneur dont elle est grosse pour l'en faire acoucher. Si le Roy n'a ce pouuoir, l'aduis est vain. Mais qui y prendra garde, trouuera la puissance souueraine plus fecondée des deux dernieres sortes d'honneur que i'ay dites, qu'il n'est besoing pour cela. Premiere-

ment dans la seconde espece il y trouuera des degres de noblesse dont le Roy peut gratifier ceux qui le seruent à sa volonté, & particulièrement ceux qui voudront garder les places & prouinces successiuement & par tour. Or il n'y a rien en quoy les François soient plus sensibles qu'en leur noblesse & au ranc de leur maison, ni prise aucune sur eux qui les puisse rendre plus obeissans, ployans & suiuians la part où on les voudra mener pour vne cause raisonnable. Il faut donc reconnoistre ceste espece d'honneur & la conuertir à cét vsage.

Il y a par tout le monde vne noblesse qui est engendree de la richesse ancienne, & de la nourriture gentille qui la suit. Mais hors celle-là, il y en a vne autre que les Souuerains qui se conduisent avec plus de prudence politique, donnent à ceux qui font meilleur seruice au public, preferant non seulement les personnes qui ont tenu vn Magistrat à d'autres en l'ordre de seoir & de marcher, mais encor leurs races aux races des autres : & ceste sorte de noblesse est celle que les Romains grands maistres d'Estat ont principalement cogneüe. Qui voudra faire comparaison de ces deux sortes de noblesse, trouuera la seconde meriter plus de ranc que la premiere. Car la richesse n'est profitable qu'à ceux qui la possèdent, le merite & le seruice des personnes publiques est vn

bien commun à la société des hommes. La richesse a besoin d'estre conseruee par la prudence publique, les personnes publiques maintiennent l'honneur aux riches, la liberté au peuple, les biens & le repos à tous. L'usage de la seconde est encor de plus grand seruice & commodité pour les souuerains, que de la premiere. Car la premiere noblesse n'est pas vn don des souuerains, non plus que la richesse qui l'engendre: ains le meisme droit des gens qui a introduict la propriété des biens & la succession des enfans aux biens des peres, acquiert encor par succession de temps ceste noblesse. Mais de la seconde noblesse qui vient d'auoir serui le public, l'on est redeuable aux souuerains auxquels il appartient de deferer les pouuoirs publics. L'usage donc de ceste sorte de noblesse met en la main des souuerains vn moyen fort & puissant pour obliger leur suiets à les seruir: & à faute de le pratiquer ils se priuent eux-mesmes d'une grande autorité qui leur est vtile pour la conduite de leur Estat. Ceste vene en la mine de l'honneur est encor d'autant plus seconde qu'elle faict en ceste seconde noblesse plusieurs degres & differences. Car la premiere noblesse ne reconnoist autres degres que ceux que la courtoisie veut deferer, ce qu'elle accorde ordinairement à ceux qui font plus grand despen-

ce. Mais la seconde noblesse faict autant d'especes differentes qu'il y a de degrés aux pouvoirs & dignités publiques dont elle est deriuee. En France la posterité de celuy qui aura conquis vne prouince ou gaigné des batailles, n'a point de rang necessaire que la loy ou coutume luy attribue, ains elle n'a que celuy que la courtoisie, qui est volontaire, est contente de luy accorder. Ceste confusion de rancs en la noblesse de France est semblable à vne nuit qui tient en mesme ranc l'honneur & la honte, le merite & demerite. Comme aux armées les capitaines qui les conduisent, fuyent tant qu'ils peuent les combats de la nuit, pour ce qu'elle n'a ni honneur ni honte; ainsi en l'Estat le souuerain doit euiter ceste confusion des ordres & conditions de ses subiects, desquelles quand il faict plus de degrés & de distinctions, il se crée luy mesme plus de matiere d'honneur & de recompenses à donner à ceux qui le seruent, & plus de moyen aussi de se faire seruir en la façon qu'il iuge la meilleure.

Pour gratifier les trois ou quatre gouuerneurs temporels, que le Roy aura choisis & reduis à seruir par tout, & pour prouoquer par leur exemple les autres à prendre leur condition, il faut introduire quelques degrés de noblesse pour eux & leurs races. Ce doit estre sous des noms tels que les oreilles des François

çois y soient ja accoustumees. Car c'est sous
des noms ja vltitez que l'on introduit mieux les
changemens que l'on doit faire. Les noms
d'honneur qui sont ja en vsage en la noblesse
de France, sont ou de Cheualiers ou de tiltres
feodaux, qui sont les Ducs, Marquis, Comtes,
Barons. Je parleray des derniers desquels j'esti-
me que l'on se peut seruir, en reformant le vi-
cieux vsage qui ja y est recognu par les Cours
du Royaume. Par l'erection des terres en ces
tiltres, ni l'intention du Roy qui donne l'hon-
neur, ni celles du seruiteur qui le reçoit, n'est
effectuées. Leur intention commune est, que
le seruiteur & sa posterité ait vn ranc qui le se-
pare du corps de la noblesse. Mais le tiltre estāt
donné à la terre, non au sang, il auient double
incommodité. Car d'une part les despences
honorables & necessaires qu'il conuient faire à
ceux qui ont ces tiltres, font vendre & passer
les terres en mains telles que le Roy n'eust ia-
mais voulu honorer de ces tiltres: & d'autre-
part le sang que le Roy a voulu honorer ayant
perdu son ranc avec sa terre, il pert aussi le
moyen de se soustenir en biens par mariages de
femmes de moindre ranc & de plus de biens:
ce qui est le principal fruit & le soustien de la
Noblesse qui a vn ranc priuilegié, comme l'on
voit aux races & maisons des Princes. Le Roy
reformant ce mal peut tourner ceste reforma-

tion en vne occasion de son seruice. Puis que ces tiltres de telles dignitez sont communs en toute l'Europe, il faut emprunter des voisins vn meilleur vsage d'iceux. S'il plaist au Roy les donner au sang, comme en Angleterre, ils seront inalienables, & soustiendront par mariages d'heritiers la posterité qui en aura besoing. S'il les communique à toute la posterité masculine, comme en Allemagne, ils seront le soutien des puisnés qui en ont plus de besoing que les aînés, les appuyans par les riches mariages qui vont ordinairement trouuer les maris qui ont des dignitez plus nobles & les rancs plus grands, c'es qu'ils ayent moins de biens. S'il leur veut donner vn tiltre de terre, dont ils se disent Marquis ou Comtes, on peut imiter l'vsage d'Angleterre, où on leur donne tiltre de prouinces grandes & anciennes, où ils n'ont neantmoins ni biens ni autorité. S'il veut leur donner ces tiltres & ce ranc de Marquis ou Comtes, ou autres tels tiltres sans le nom d'aucune terre, il peut prendre l'exemple des Romains, desquels est descendu l'vsage de ces tiltres iusques à nous. Il suffit seulement que ces dignitez de sang ayent vn ranc par-dessus les autres, & vn nom pour les races qui en viendront, lesquelles on appellera Ducales, Marquisales & Comtales. L'honneur que le Roy leur aura donné sera suivi des biens qui vien-

dront à ces races sans aucune charge du Roy, par les mariages des femmes riches qui ne cedent point aux hommes en l'ambition du ranc. Alors l'honneur aura le premier lieu en la cupidité des hommes, & l'or le suivra : au lieu qu'en vn Estat depraué l'or est le premier desiré, sans que l'on desire autre honneur que celui qui prouient de l'or. Les querelles ne seroient non plus en France pour ces rances, qu'elles sont en Angleterre par le reiglement qui y est faict. Les races les premières venuës ne pourrout tenir la porte fermée aux autres, quand le fils d'un homme qui aura acquis ce tiltre à sa race precedera le petit fils d'un autre; & en general le plus proche en degré en vne race, precedera le plus esloigné en vne autre; sauf qu'entre ceux qui seront en pareil degré, celui qui comptera plus de maieurs ayans faict pareil service, aura la precedence. Le Roy ne changeant rien pour les Gouverneurs à vie, & donnant l'honneur de ces tiltres & du ranc aux gouverneurs temporels, ils aduiendra que les Gouverneurs à vie desireront à leurs races cet honneur legitime, assure, inalienable avec la suite des richesses par mariages. Et pour l'acquiescer apporteront aux pieds du Roy leurs gouvernemens pour estre seruis partout, & leurs personnes aussi pour servir partout à ces gouvernemens pour la solde d'un honneur si precieux. Com-

me il y a plusieurs differences de gouuernemens en France, aussi y aura-il de ces tiltres & de grés de Noblesse pour fournir à toutes sortes de gouuernemens, en commençant par les petits, & finissant par les plus grands. Aduenant la mort de l'un d'eux, le Roy mettra en son lieu celuy qu'il voudra choisir entre tous ses suiets, qui par son seruice acquerra ceste Noblesse à sa posterité, si ja elle ne s'y trouue acquise.

L'honneur aura d'autant plus de force sur leurs esprits, quand l'usage du ranc qui leur sera donné sera plus ordinaire, & fera vne compagnie perpetuelle aux hommes qui en seront honorez. Car ceste distinction des rancs & leur frequent usage a ceste force d'engendrer en l'ame vne douleur d'estre vaincu ou surpassé, ceste douleur vne emulation de vaincre, & l'emulation vn desir d'acquérir le merite qui est couronné de ceste preference. Ainsi se faict vne foule & vne presse de gens qui courent à seruir le Souuerain en la façon qu'il desire, puis qu'il est seul iuge de leur merite & distributeur du bien auquel ils aspirent. Les animaux se conduisent par leurs passions, & les hommes par la raison. L'emulation est la plus forte passion qui commande aux animaux seruans l'homme en compagnie. On voit aux chiens & aux cheuaux quels efforts elle leur fait rendre. Quand

elle est excitée entre les hommes, elle n'est pas moins violente sur eux : car ils pensent bien que ce leur soit vne raison suffisante en la conduite de leur vie, que le contentement de ceste passion. L'experience monstre cela au peuple des villes de France. La Venalité des Offices en a causé le grand nombre que l'on y voit, d'autant qu'il est mal-aisé au Souuerain de refuser l'argent que l'on se haste de luy donner pour créer de nouveaux Offices. C'a esté vice aux premiers d'achepter les Offices; ce vice est tourné en coustume, & la coustume en nécessité, puis que c'est auiourd'huy imprudence à qui le peut de n'en achepter pas. C'est d'autant que le nombre des Offices a fait vne grande variété & distinction de rancs, que les hommes & les femmes vont à l'enui acheptans, fondans tout autre bien pour le transformer en celuy-là. Si au peuple ceste passion fait tant de violence, que fera-ce en la Noblesse, si elle y est vne fois allumée. Ce desir est naturel en l'homme d'accroistre la condition de soy & des siens & la rendre meilleure selon l'ordre de l'Estat sous lequel il est né. Les Souuerains par nonchalance peuuent laisser alentir ce feu, ne s'aidans pas de ce gouuernail qu'ils ont entre leurs mains. Mais le sage politic nourrit ce feu naturel, l'excite & l'enflamme, en le tournant à l'vsage & au seruice de l'Estat. Pour l'eschauf-

fer dauantage on peut accompagner ces degrés de noblesse attribuez aux gouuerneurs seruans par tout, des honneurs de la troisieme espece, comme de rendre les plus grandes compagnies du Royaume conseruatrices de la memoire de ces races, faisant registrer solennellement la naissance, les mariages, les morts de ceux qui en seront, & d'autres honneurs extérieurs de ceste mesme espece, dont la mine estant si riche & plus facile à fouiller, ie serois peut estre trop long de reciter les auantages qui s'en peuuent retirer & employer à ce suiet.

Il suffit que la mine de l'or dont quelques Princes s'aident n'est nullement comparable en bonté à la mine de l'honneur, si on la sçait fouiller & s'en seruir. Car les Roys ont la matiere de l'honneur en leur puissance, & n'en peuuent iamais estre pauvres: bien le peuuent-ils estre de la matiere de l'or, qui n'est pas tant en leur pouuoir, comme est la marque de leur monnoye. Dauantage la mine de l'or estant espuisee ne recroist plus: mais l'honneur estant diminué de valeur pour diuerses causes, ou en peut subroger vn autre en sa place, que l'on prefere à celuy-là. Ainsi l'ordre de l'Estoile, qui estoit celuy des Rois de France, estant vſé, ils ont dressé celuy de saint Michel; & apres celuy-là, celuy du saint Esprit. La banniere

de l'or estant ieule proposee aux hommes, les rend seruiteurs de l'or de quelque part qu'il vienne. La banniere de l'honneur les fait suiure ceste vertu ou ce merite, à qui le Souuerain propose la couronne d'honneur. L'homme qui suit la banniere de l'or, est bien plus propre pour vendre son maistre, que pour luy accroistre son honneur ou deliurer son Estat d'un grand danger. Au contraire la banniere de l'honneur dresse à la foy enuers le Souuerain, les peuples neufs qui sont encor en leur enfance: & quand aux peuples vieux ja corrompus & deprauez, elle les peut ramener de la deprauation, les refondre & rajeunir, & les remettre au chemin de la fidelité: ce qui peut empescher que les Estats ne meurent necessairement comme les hommes ausquels le principe de vie est du tout irreparable. Partant le plus asseuré remede au mal qui trauaille la France, & la menace de pis, est en la proposition des degres de Noblesse dont j'ay parlay, à ceux qui seruiron le Roy fidelement: & ce remede est plein de iustice, & desirable en commun, tant au Roy qu'à ses seruiteurs. Car bien-heureux sont les seruiteurs d'un Souuerain, qui pour leur seruice acquierent non seulement quelque honneur ou commodité à leurs personnes, mais encor' vne dignité naturelle à leur sang & à leur posterité: bien-heureux aussi est

le Souuerain de qui les seruiteurs sont prouoquez à la fidelité par l'acquest d'un si riche loyer, & diuertis de l'infidelité par la perte d'un tel honneur.

F I N.

Extraict du Priuilege du Roy.

PA R grace & Priuilege du Roy, il est permis à PIERRE DVRAND Maistre Imprimeur à Paris, d'imprimer, vendre & debiter par tous nos Royaumes, terres & seigneuries, pendant l'espace de six ans, vn petit liuret intitulé, *La Maladie de la France, Discours en deux Parties, presenté l'an 1602. au Roy HENRY LE GRAND, par M^e IAQVES LESCHASSIER Aduocat en Parlement*: Faisant defences à tous Libraires & Imprimeurs, de quelque qualité qu'ils soient, ou puissent estre, d'imprimer ou faire imprimer, vendre & debiter ledict liuret, pendant lesdicts six ans, sans le consentement dudit exposant, à peine de confiscation des exemplaires, & de deux cents liures d'amende, comme plus amplement il est porté par ledict Priuilege. Donné à Paris le 15. Decembre 1617.

Par le Conseil.

Signé,

DE HVMERY.

